

Բ Ղ Դ Է

Գ Ե Ր Ճ Գ Ռ Օ Շ Ե Ա Ն Յ Ի

Նուէր մեծ. բժշկապետ Յովհաննէս Գասպարեանցին:

(Շարունակութիւն 1)

Ի. 2.

Տ Ո Ի Տ Ո Ի

Կարբուժը, Կիզի-մատուռի հիւսիսային կողմը, շատ ժամանակ չէ՛ մի ձեռք տուն է բուսել, մի երկու յարկեայ փոքրիկ շէնք:

Ինքն ըստ ինքեան այդ շէնքը մի երևելի և նշանաւոր բան չէ, փոքր ի շատէ ճաշակը զարգացած մարդի համար աչքի ընկնող ոչինչ չ'ունի. բայց ներկայ Կարբու նման մի գիւղի համար այդ տունը լաւերից մինը կարելի է համարել:

Լաւ ասածս պէտք է հասկանալ վերնայարկի վերաբերութեամբ, ապա թէ ոչ, ներքին յարկի վերայ ոչինչ ջանք չի գործ դրուած, անկարգ, անձև պատերով շրջապատած մի քանի ծակեր են, որոնք ոչ գոմի պէտք կը լինին, ոչ խոհանոցի ու մառանի, ոչ զբաստ կապելու մարքի տեղ է թողած, ոչ վաւարանի ծխնելոյզ, ոչ գիւղական թոնրի համար մուկս քաշելու երզիկ և ոչ լոյս մտնելու մի ծակ:

Այս իսկ պատճառաւ՝ շինուած օրից մինչև հիմի ներքնայար-

1) Տե՛ս «Մուրճ»-ի 1889 թ. № 12 և 1890 թ. № 1, 2, 3, 4:

կումը շունչ կենդանի եթէ որոնելու լինիս, ցամաքային խոնաւսեր գորտերից ու հողաբնակ ժժմուկներէից աւել ոչինչ չես գտնիլ: Տան տիրոջ ուշքն ու միտքը, բոլոր հոգացողութիւնն ու ծախսած դրամը սպառուել է վերնայարկը զարդարելու և արևելեան ճաշակով կարմիր և կանաչ նկարներով լցնելու վերայ:

Պարսիկ ծաղկարարը հարեմական, ախտաբորբոք սեղեխների կենդանագիրներ ծեփելով սենեակների պատերին, համակերպուել է, երևի, տան տիրոջ ժամանակակից հաճոյքներին և դիպուածական տրամադրութիւններին: Իսկուածական և պատահաբար՝ որովհետև տան ջահէլ տէրը շինութիւնն սկսելուց մի քանի օր յառաջ միայն զգաց իսկապէս, որ ինքն էլ նորահաս Երիտասարդ է և բնական հակումն ունի դէպի գեղեցիկ սեռը:

Նորաշէն պալատը, եթէ լսողների ականջին ծանր չը հնչէ այս մեծաբանութիւնը, և իւր տէրը շատ չար ու բարի լեզուներ սրեցին իրանց դէմ և բամբասանքների ու աստիուսէքի տեղիք տուին:

Խօսողներն իրաւունք ունէին. տունը շինուել է, կահաւորուել է, կարասիներով լցուել է, բայց ոչ տէրը մի կտոր հաց է կերել մէջը և ոչ տես ու ծանօթներ մի կթղայ օղիով շնորհաւորական բարեմաղթութիւններ են արել:

Ճորեկները զռները բոլորովին փակ են եղել, իսկ գիշերները մի պառաւ կին միայն ձիթի ճրագի աղօտ լուսով, ուրուականի նման, իւր երկար ստուերն է տարածել անկիւնից անկիւն, սենեկից սենեակ:

Երբուել չեմ կարող, վերջերում գիշերներ են պատահել, երբ տան երիտասարդ տէրը իւր հնմաշ անկողինը գետնին փռուած թողնելով՝ ինքը ժամերով երթևեկել է փակուած սենեկի մէջ և յուսահատ կամ յուսապարար գլորուել ու խումփացել մինչև լոյս:

Պարզելու համար ասենք, որ տան տէրը, որ թոյլ է տուել իրան այս շտապութիւնը, մեր բարեկամ Բղզէն է. իսկ պառաւը՝ իւր մայր Սալբին:

Բղզէն շինութիւնն սկսել տուեց Երևանից վերադառնալու օրը, և ի պատիւ նորա՝ պէտք է խոստովանած՝ ոչինչ չը ինչայեց իւր շէնքը փառազարդելու համար, որպէս զի, ինչպէս ինքը շատ անգամ յեղջեղում էր իւր սրտի խորքում, ջհուտ Աղաջանի աչքերը չլացնի իւր հարստութիւնով, Շողիկին իրանը շինի, փափագին հասնի

և յետոյ Աղաջանին լակ ձուի նման պատույր զարկի, հողի հետ հաւասարացնի:

Բղդէն շինութիւնը կարգի դրեց ու ինքն իւր նոր գործին տիրացաւ:

Այդ էր պատճառը, որ ցորենառուի թափառական պաշտօնը թոյլ չէր տալիս նրան վայելել իւր պալատի հեշտութիւնները:

Սալբին էլ, իբրև հին կին, աւելի գերադաս էր համարում իւր միտտ թոնրատանն օրն ի բուն փսփսայ, քան թէ աղտոտ ոտքերով սենեակների փռուածքը տրորել:

Ուրիշ գործ ու զբաղմունք չ'ունէր Սալբին. նա շարունակ պարպած էր իւր որդու գնած դիւրագին յախճապակեայ պնակները լուանալով, որոնք Կարբու համար նոր շապուութիւններ էին. ըստ որում գործածականը տեղական շէնքի հասարակ կաւէ անթներ էին:

Պառաւը լուանում էր, ցամաքեցնում էր, դասաւորում էր իւր թոնրատան դարակների վերայ և կրկին մի ժամից վայր էր բերում և էլի լուանում:

Սալբու սովորական զրոյցընկերը լինում էր Տուտու նանը. և Տուտուն էր, որ շարունակ հանդիպում էր Սալբուն պնակները լուանալու:

— Հերի՛ք է, հերի՛ք, Սալբի բաջի՛, ախար ընչո՞տ են, որ այդքան լուանում ես, առած օրից դէսը դեռ չեն իւղտուել, տղէգ տան երես չի տեսնում, դու էլ Բայագիդից բերած ժանգոտ պղնձէ ամանումն ես չլքուր ուտում, իսկ թանով ապուրի համար՝ հողէ քերեղանը կայ ու կայ:

— Ընչի՞ն աղտոտ թողնեմ, փոշին կը նստի, շնորհքը կ'երթայ, Տուտու. ջան, տես ի՞նչպէս Փրֆուում են, Սալբին մեռնի՛ սրանց առնողի ջանին, ոգևորուում էր Սալբին և ուրախութեան արտասուքը ծպծպան աչքերից ցօղում:

— Աստուած քեզ բաշխի՛ մինուճարիդ, բարո՛վ մի խորտիկ հարա բերես, նոր շինած քեռչկ ու սարայումը՝ շորոր տալով առջևդ պտոյտ դայ, միշտ ցանկութիւն էր յայտնում Տուտուն և առաջարկում Սալբուն հանել ծոցից իւր քթախոտի տուփը:

— Աէ՞ որ երեկ բուռնութուդ պարկը լցրի, Տուտո՛ւ, դու հէնց դորա համար ես գալի՛ս, յանդիմանում էր շատ անգամ Սալբին Տուտուին, բայց միշտ էլ նորա պարկը լցնում էր:

Մի օր Տուտուն, ըստ սովորականին, ներս մտաւ Սալբու մօտ և սառած մնաց:

Պառաւի աչքերը խոր ընկած էին, շորացած արտասուքի շետքերը նշմարուում էին, գոյնը դալկացել էր, թիկունքը կռացել, երկուտակուել էր: Մի խօսքով, Սալբին այսօր կատարեալ զառամութեան հասած պառաւի էր նման, որ այլ ևս գործելու ոյժ չ'ունենալով՝ ինամատար հոգածուից միանգամայն զուրկ՝ մահ է խնդրում և անողոք մահը փախս է տալիս նրանից:

Սալբին նստած էր պրտուեայ խսիրի վերայ, պնակները անկարգ ցրուած էին առջևը, մի հատ էլ ձեռքին էր մնացած, երևում էր՝ ուզեցել է լուանալ և չի կարողացել:

— Ի՞նչ է, ի՞նչ է պատահել քեզ, Սալբի բաջի՛, մօտ վազեց Տուտուն, այդ ի՞նչ օրն ես ընկել:

— Ոչինչ, խոր հոգւոց հանեց Սալբին:

— Ի՞նչպէս ուրիշ, այստեղ կոյր մարդ չը կայ, ամեն մի աչքիդ բունը մի մի ընկուզից աւելի են սուզել, մեծացել, գերեզմանից դուրս քաշած շորեքօրեայ Ղազարոսի գոյնն ես ստացել:

— Ի՞նչ անեմ, Տուտո՞ւ, մօր օրօրոցը կրակ պէտք է ընկնէր, որ ոչ մեծանար, ոչ որդու ցաւեր տեսնէր:

— Ի՞նչ է քա, չը լինի՞ Բղդէդ, հեռի իրանից, մի հանդիպսի է (դոքոհարք) հանդիպել:

— Հանդիպսի՛ հանդիպի իմ երեխին հանդիպսի հանդիպեցնողը:

— Ախար ի՞նչ կայ:

— Էն կայ՝ որ երեխիս խելքը գլխին չի:

Այս բացականչութիւնով Սալբին պատմեց, թէ մի քանի գիշեր է միայն, որ իւր որդին տուն է գալիս, այն ինչ նոր պաշտօնին տիրացած օրից, մեծ մասը զիւզերումն էր մնում, թէ իւր Բղդէն մտնում է սենեակներից մէկի մէջ և փակուում, ոչ հաց և ոչ ջուր է պահանջում և շարունակ բաց աչքով լուսացնում է՝ ինքն իրան խօսելով և հառաչանքներ ու սպառնական խօսքեր արտասանելով: Պատմեց Սալբին՝ թէ ինքը բազմիցս դուռը բաղխել է, աղաչել, թախանձել է՝ տուն թողնել իրան, յայտնել ցաւերը, բայց որդին անողոք է մնացել մօր պաղատանքներին և երկու խօսքով ահ տուել, թէ նա իւր գլուխը մահու կը տայ, դաշոյնով սեպհական փորոտիքը կը թափի, եթէ միւս անգամ իրեն ձանձրոյթ պատճառեն:

Վերջ բանին պատմեց Սալբին, թէ ինքը մի հնարք է մտածել, հէնց որ որդին ձիուց իջել է՝ նա մի տեսակ յաջողեցրել է հեար ներս մտնել նորասենեակը, փարուել է Բղդէի ծնկներովը և մայրական սոխնքն ու ծծած կաթը բարեխօս կացուցանելով՝ կարողացել է դուրս կորզել իւր հարազատի սրտնեղութեան շարժառիթը:

— Սաքի թէ ի՞նչ, հետաքրքրուեց Տուտուն:

— Թէ էն՝ որ իմ սիրելի զաւակը սիրահարուած է:

— Ուրեմն դու դորա համար ես գլուխդ մահու տալիս, ծաղրեց անմխիթար մօրը խելացի Տուտուն. օրն էսօր կերթամ խնամխօս և լոյսը չը բացուած՝ նշանը կը տանենք:

— Հէնց էդ է, որ տղիս ցաւի դեղապետը, նորա դարդի դարման պտուղը քաղած ու տարած է, այլ ևս ձեռք չի ընկնիլ, հոգոց հանեց Բղդէի մայրը և պարզ ասաց, որ իւր որդին ցնդած է ջհուտ Ազաջանի դուստր Եողիկի սիրով, իսկ, ինչպէս յայտնի է, Եողիկն երկու տարի է, որ անուն արած է, տիրունի է և մի քանի օրից կը պսակեն, կը տանեն:

— Է՛հ, քո ճարը գա՛յ, քամահրեց Տուտուն, մէկը չը լինի, միւսը կը լինի, աղջիկն աղջիկ է, Կարբուց մի՛ ուզիլ, ուրիշ գիւղից տար, Բղդէիդ հիւրի ամենքը կ'ուզեն փեսայացնել. դու իրանից հարցրո՛ւ, յոյս տուեց Տուտուն, որի վերայ մատը դնի, ես մի օրումը գլուխ բերեմ:

Որդեսէր մօրը չը կարողացան սփոփանք պատճառել կարեկից հարեանի մխիթարական խօսքերը. նա յայտնեց, թէ իւր որդին կտրական վճռել է՝ Ազաջանի տունը բնաջինջ առնել, Բստիննեց Սհօյի ծուխը կտրել և վերջն իրա գլուխն սպանել, եթէ գործն այդպիսի վախճանի հասնելու լինի:

Վերջապէս Սալբու խօսքերիցն իմացուեց, որ Տէր-Ցակովբի պատգամաւորութիւնն անյաջող է եղել, թէ ջհուտ Ազաջանը վրձուողապէս յայտնել է, որ եթէ աշխարհումս մնան միայն ինքն ու Բղդէն՝ նա այն ժամանակն էլ իւր աղջկանը կը թթուացնի, կը քացախացնի, կը պառաւացնի և Բղդէին չի տալ:

Տուտուն քթի տակին ժպտաց:

— Իսկ եթէ ես գլուխ բերեմ, ինձ ի՞նչ կը տաք, հարցրեց նա:

— Ինչ քո սիրտը կը ցանկանայ:

— Խօսքով փլաւ շի եփուիլ, իւղ ու բրինձ է հարկաւոր, բեր տեսնեմ՝ որքան ես ցնծում, որ ես ամեն դժուարութիւն հեշտացնեմ:

— Է՛հ, Տուտու ջա՛ն, շատ մեծ մեծ ես բրթում, կուրանայ ու խաւարի Բղդէիս մէրը, նորա առաջին բոլոր դռները փակ են. երեխէս պատմեց, թէ ինքն էն ծակծկոտուելու Շողիկի հետ երես է երես խօսեցել է և նա իմ տղիս մարդատեղ շի դրել:

— Էդ ուի՛նչ, դու փող ասա՛, որ աչքեր կապի, մենք էնպէս կ'անենք, որ Շողիկը մոմի պէս կը հալուի ու կամքի կը գայ, մենք էն հնարը գիտենք, որ եթէ դռները առաջին փակէք, երթկովը տուն կ'ընկնի:

— Տուտու ջա՛ն, էլ ո՛ր օրուայ համար ես պահել բարեկամութիւնդ:

— Ախար բան ասացի, սրբի դուռն էլ առանց խաշամբուրի չեն գնում, դեռ մոմն ու խունկը, մատաղն ու գանձանակը չեմ ասում:

— Ա՛յ քեզ դուրբան, ինձ փողն ո՛վ է տուել, որ քեզ տամ, եթէ բանը գլուխ բերես, Բղդէս քաշովդ մին ոսկի կը տայ:

— Հապա դու էլ ընչի՞ր ես անունդ Բաղդասար աղայի մէր դրել, որ մի քանի սև փող էլ չ'ունիս ծոցումդ՝ քեզ համար ժամի ու աքքառի տալու:

— Թէ սև փողով բան գլուխ կը գայ, աչքի՛ս վերայ. հաւ ու ճիւ եմ ծախում, ձու ու բազուկ եմ ծախում, մէկ մէկ Բզգէս սիրտն ուրախ ժամանակը սպիտակ փողեր է տալիս, թէ՛ աղէ՛, քեզ համար գանձանակի փող արա՛. էլ ի՛նչ երկարացնեմ, բաժինքումն բերած քսակիս մէջ տասը մանէթի չափ հոգեպահ հուսա ունիմ, թէ որ Բղդէիս փափազը կատարուելու համար էդքանը բաւական է, վե՛րկալ, վերջն էլ երբ Շողիկը մեր դռնով հարս մտաւ, կա՛ց ու ոսկու մէջ լեղ տո՛ւր:

— Առաջին ծախսերի համար հերիք է, գնա՛ բեր:

— Բայց չ'ասացիր, թէ մոքի՛նգ ի՛նչ է, ի՛նչ հնարքներ ես գործ դնելու:

— Էդ բանից ձեռքերդ լուա՛, տասը մանէթ չէ, որ քաշովս մէկ ակն ու մարգարիտ տաք, իմ բերանիցս ոչ տաք դուրս կը գայ, ոչ հոփ:

Շատ խնդրեց Սալբին, բայց Տուտուն մնաց անյողդողդ, հետն

էլ սպառնաց, որ եթէ իրան չեն հաւատալ, մի շաբաթ չի քաշիլ, Բղդէն խսպառ խելքահան կը լինի, կամ արեւոտէր դառնալով՝ Սիրի կերթայ:

Այս խօսքերն էին, որով տասնեակ տարիներով դիզած Սալբու կոպէկներն ու սպիտակ փողերը լոյս աշխարհ տեսան և Տուտուի ծոցագրպանումը գետեղուեցան:

ԻԷ.

ՆՈՐ ԱՇԽԱՐՀ, ՆՈՐ ՄԱՐԴԻԿ

Փամբակաձորումն է Ն. անունով հայաբնակ գիւղը: Նա արքունի ճանապարհից շատ ծռանց է և ընկել է Աբարանի ու Փամբակի բարձրաբերձ լեռներից կազմուած մի խոր ձորի մէջ:

Այս գիւղի հետ հաղորդակցութիւն ունեցող անիւի միակ ճանապարհը գալիս է գիւղի արևելեան կողմից, իսկ արևմտքից միմիայն մի նեղ կիրճ է առաջնորդում ձիաւոր կամ հետեակ ճանապարհորդին դէպի ձորաբնակ կիսավայրենի, բայց հիւրասէր ժողովուրդը:

Այսօր չէ՝ բայց տասը տարի սրանից յառաջ իւր գլխից ձեռք վերցրած մարգը միայն իրան թոյլ կը տար առանց շատերի ուղեկցութեան վստահօրէն անցկենալու վայրի այծերի և մանրատոտիկ եղնիկների այս քարածերպերիցը և Ն. գիւղը մտնելու:

Ուրիշ ելք, կամ մուտք ամեն կողմից բնական լեռնային սահմաններով ընդհատուած են:

Ձորամիջի է, ասացինք, Ն. գիւղը, բայց ինքը նստած է լեռան բարձրագիւր լանջի վերայ:

Այդ դիրքը ընծայում է գիւղին մի բանաստեղծական տեսք՝ արևելեան լայն ճանապարհով գիւղն եկող սալաւորների, ձիաւորների և հետեակների համար: Փոխադարձաբար՝ գիւղացիք էլ միջոց ունին իրանց տների առաջից զուարճանալ իրանց մօտ շնորհ բերող ճանապարհորդներին տեսնելով: Ուզում եմ ասել, թէ որքան գիւղի արևմտեան կողմը սեղմուած է սարերի մէջ, հետևաբար մինչև գիւղի ակը չը հասնես, մի տուն չես տեսնիլ, այնքան ընդհակառակն արեւելքից մի լայնատարած, ծաղկալից, սիրուն հովիտ ընդարձակուում է և ծայրը մինչև մեծ ճանապարհը հասցնում: Եթէ աչքերդ սուր

են, դրանդ նստի՛ր և հինգ վերստից եկողին նայի՛ր, հէնց կարծես, եկողը, թէչի բաժակի նման, մատուցարանի վերայ առաջդ է գալիս:

Աշնան վերջերն է. լեռների կտտարները մէկ օր՝ տարիների հաշիւը կորցրած զառամեալ ալեւորի գլուխ են դաւնում, միւս օրը՝ թխագանգուր երիտասարդի կերպարանք են ստանում արեգակի քմահաճութեան համաձայն. միմիայն հաչի համար երկու նուիրական ալեզարդ ծերունի նահապետներն են, որոնց վեհութեան յառաջ խոնարհում են Այրարատ աշխարհի բոլոր միւս բարձրաւանդակութիւնքը. Մասիսն ու Արագածն են, որ սպիտակափառ գլխներով հարաւից և հիւսիսից հովանաւորում են իրանց փոքր եղբայրներին:

Ղարաջօբանու լեռուը, որ Փամբակի հարաւային կողմի սարերից ամենաբարձրն է և չ. գիւղը տանող լեռնային ուղղաձիգ ճանապարհը, ամառն էլ վտանգաւոր է, թող թէ աշնան վերջին կամ ձմեռու Վտանգն երկու կողմից է. եթէ բաղդ ունեցար ազատ պրծնել սարի գլխի անընդհատ գիժ քամիներից և բքերից, կարող ես անբաղդ գտնուիլ և մի վայրկենի մէջ գլխիցդ զրկուել և ձորն ի վայր անգլուխ թաւալազլոր մինչև անդունդը ճանապարհորդել ու այնտեղ արծիւների ու անգղների համեղ կերակուր լինել:

Ես ոչ ականատես և ոչ երաշխաւոր եմ, միայն ասում են՝ որ Ղարաջօբանի բարձրութեանց վերայ բնութիւնն ինքն է մարդակեր աւագակների համար շարմար որջեր ստեղծել:

Ահա այս ահռելի սարիցը, աշնան վերջին, անվնաս ցած իջան երկու հողի և երեսներին խաչ քաշեցին, երբ չ. գիւղի արեւմտեան ափի մարագներից մէկի պատի տակին հանգիստ առան:

— Կինարմատի խելքով ընկանք, ազէ՛ (Տայրէէ), ասաց երիտասարդ տղամարդը ձիու սանձը բռնելով, ես օձի միս կ'ուտեմ և միւս անգամ կրկին այս տեղով չեմ վերադառնալ:

— Իմ յոյսս հաստատ էր, որդի՛, որ չ. գիւղի հրաշագործ տէրտէրի արժանաւոր օրհնութիւնը մեզ կը պահպանի. մինչև էսօր նորա դուռը գնացողներից ոչ մէկը փորձանքի չի հանդիպել:

— Ե՛հ, ինչ և իցէ, Աստծուն փառք տանք, որ էս անիժած սարիցն ազատուեցինք, և շտապենք՝ քանի մութը չի կոխել՝ էս անլեզու անասունի համար մի տաք գոմ ու կեր ձարել, մեզ համար էլ մի գլուխ դնելու տեղ գտնել:

— Սիրոգ հանդարտ պահիր, զաւակս, մենք ուղղակի կ'իջնենք տէրտէրի տանը. լուսահոգի հօրգ հետ նա սրտէ ի սիրա բարեկամ էր և Մողնու ուխտին սուրբ Գէորգ գալուս մի երկու գիշեր կարբուժը մեր տանը պատիւ է տեսել:

Մայր ու որդի՝ ձին քարշելով՝ գիւղը մտան և առաջին հանդիպած ծերունուց քահանայի տունը հարցրին:

— Ի՞նչ գործ ունիք մեր տէրտէրի հետ, մա՛յրս, պատասխանեց ալեորը:

— Տէրտէրը մեր ծանօթն է, նորա մօտ պէտք է իջնենք:

— Ո՞ր գիւղն էք գնալու:

— Ուզիդ տէրտէրի մօտ ենք եկել:

— Երևում է գրի գործ ունիք:

— Հրամայի՛ք:

— Որ էդպէս է, հետս եկէք, տէրտէրին ոչ էս գիշեր կարող էք տեսնել և ոչ վաղը:

— Ախար ըն՛ի՞ համար:

— Եդ ձեր գործը չի, էս իրիկուն դուք իմ հիւրերն էք, հետս եկէք:

Անձանօթները ծերի խօսքերից ոչինչ չը հասկացած՝ կուրօրէն հետեւեցին նրան:

ԻԸ.

ՎԵՐԻՆ ԳԼԽԻ ՇԱՐՈՒՆԱԿՈՒԹԻՒՆԸ, ԿԱՄ ՇԱՍԱԽՕՍ ԿԱԶԱՂԱԿ

— Հլա՛ բա՛րի ընկուն, ա՛յ քիր, ա՛յ ջհէլ բա՛լամ (էրիտտարդ), բա՛րով հզար բա՛րի էք ե՛կել մեր շէ՛նը, մեր օ՛ջաղը, ա՛մեն ճա՛մփից հե՛շտ: Է՛յ, Քարհանանց ա՛ղջիկ, քէ՛յվանի, դվո՛րն ես հլա՛ծա՛կուել, դէսն արի՛, տե՛ս, քե հմա ի՞նչ ա՛ղիզ զօ՛նաղ եմ բե՛րե: Է՛, ա՛ ջհէլնի, ա՛ քռանգաջնի, խի՞, բա դուք ուղո՛ւփ չ՛ունի՞ք, դուս թափեցէ՛ք, ձին քաշե՛ցէք, ա՛լափ տուէ՛ք, Ա՛ստծու զօնաղնե՛րին պա՛տիւ տուէ՛ք:

Այս ուրախ բացականչութիւններով ներս մտցրեց ծերունին հիւրերին իւր յարկի տակ:

Հիւրերն էին մեզ ծանօթ Տուտուն և իւր որդին:

Տուտուն ստացաւ Սալբուց տասը մանէթը և նոյն օրը որդու ուղեկցութեամբ Փամբակու ձանապարհը բռնեց: Երկրորդ օրն էր, որ նրանք Կարբուց դուրս էին եկել:

Տուտուն զարմացած՝ որդուն հարցասիրական նշան արաւ, երբ ծերունու յարկի տակ տեսաւ երկու ուրիշ օտարականներ էլ, որոնցից մէկը մի հաստամօրուս ռուսի մուժիկ էր, միւսը գլխի կէսը մէջ տեղից գերծած մեծափափախ ուղտապան, Զօբանքեարայ թուրք:

—Մ' կնիկ, ասաց ծերունին կիսաերևանցու — կիսայուեցու. բարբառով և առողանութեամբ, որով խօսում են ընդհանրապէս փամբակեցիք և որը մենք աւելորդ ենք. համարում կրկնելը. ա' կնիկ, շուտ արա՛ էս այլազգերին հաց ուտացրո՛ւ, թող գնան հանգստանան, հարսներին էլ հրամայի՛ր, որ ջահէլներին աւանձին իրիկնահաց տան, իսկ մեզ համար, մեր երկու ազիզ հիւրերի հետ միասին մեր փոքր տանը սուփրայ բաց արա՛, նստենք, չորս հոգևով մի քիչ քաղցր զրոյցներ անենք:

Տուտուն գլխով բացասական շարժումն արաւ և յայտնեց, որ իրեն համար ամօթ է տան տիրոջ պէս մի պատուելու ծերի հետ սեղան նստել, կամ թէ բերանի փակը արձակել ու խօսել:

—Ձէ՛, պատասխանեց ծերունին, այսուհետև ոչ քեզ, ոչ իմ պառաւին վայել չէ չըխօսքան մնալ, կամ տղամարդից քաշուել, մենք երեքս էլ օրերս անց ենք կացրել, ասաց, թող ջահէլ հարսներն իրանց յարգեոր պահեն: Դուք, կարծեմ, շատ զարմացաք, երբ ես ձեզ ասացի, թէ էսօր տէրտէրին չէք կարող տեսնիլ. ես կամենում եմ սեղանի վերայ մեր իրիցի մասլահաթն անել:

Եւ հիւրասէր տանուտէրն այսպէս սկսեց իւր շատախօսութիւնը, նախապէս ներողութիւն խնդրելով, որ ինքը շատախօս կաշաղակի նման պէտք է ձանձրացնի իւր հիւրերին:

—Ինչպէս երևում է, ձեզ յայտնի է մեր տէրտէրի գրի զօրութիւնը, սրա նման գրբաց արար-աշխարհըմն երկուսը չի լինիլ. սրա մօտ զտնուած գրբը Սողոմոն իմաստունի իւր մատներով գրածներն են:

—Պարզ բան է, որ էնպէս օջաղ կայ, որ հօրից ու պապից ժառանգութիւն է ստանում բացի հողը, փողը, չորքոտանին, էլի մի էնպէս բան, որ շատերի տանը չը կայ: Էնպէս տուն կայ, որ բոլոր

եղբայրներն իրանց պապերի գիտեցած արհեստն են բանացնում. օրինակի համար՝ հէնց մէկը մենք. ինձ Զուհլակենց Դաւիթ են ասում, Զուհլակենց տունը ողջ Փամբակին յայտնի է, ես էլ, իմ չորս որդին էլ, իմ բաժան եղբայրներն էլ՝ բոլորս ջուհլակ ենք: Հէնց որ դաշտի գործը վերջանում է, մէկս ու մէկս ոսներս հորումը քաշ ենք անում ու մակուկը խաղացնում. ա՛յ, տես քո բարի աչքովը, էն քնջնի փոսն է մեր ջուհլակի հորը, հէնց էս սհաթիս էլ կուաւը հինած՝ սանտրի միջոցն անց է կացրած:

Տուտուն գլուխը տմբտմբացրեց ի նշան համաձայնութեան:

—Մեր հարևանենք էլ ներկարարենք են կուռուում, շարունակեց Զուհլակենց Դաւիթը, հէնց էս բոպէիս նրանց մեծի ու պստիկի ձեռքերը կապուտ են, մեր գործած կուաւը նրանք լեղակի կարասն են կոխում, կապուացնում ու տիրոջը տալիս:

—Ճներ էլ կան, որ իրանց հին պապերից ժառանգել են մի մասունք, մի սուրբ աւետարան, մի խաչ և մինչև էսօր էլ նրանց քնջներից մէկում էդ սրբութիւնները բաղմացրած են, ուխտ գնացողների փափազը կատարում են, նրանց աէրերն էլ էդ սրբի խաչհամբուրոցն են ապրում:

Տուտուն կրկին հաւանական նշան արաւ:

—Հէնց հէպէս էլ մեր քահանէն է, կցեց Դաւիթը. էդ Սողոմոնիքն ու Վեցհազարեակն իւր պապերիցն են իրան մնացել. իմ ողորմած հոգի պապս պատմում էր մեր տէրուէրի պապերի արած հրաշքները: Ասում է՝ դրանց տան հօտաղները, մշակները, մինչև անգամ կով կթող կնանիքը բոլորը սատանէք են եղել. ախար լսած կա՞ք, որ կին սատանայ լինի, բայց նրանք ունեցել են. էն ողորմածիկը գրի զօրութիւնովը սատանէքանցը դուրս է կանչել գեանի տակից, վրաներիցը մի մի մազ պոկել է, աղաքարի տակն է դրել ու նրանց իւր տանն անվարձ անհաց բանացրել է. ախար էդ անիծածները՝ ինչ տեղ ուղում ես պահիր իրանց մազը՝ կը հանեն ու կը կորչին, բայց հէնց որ աղաքարի տակը դրիր, դիպչել չեն կարող, դրանդ շունը կը դառնան:

—Ասում է մեր զիւղացիք՝ մեծ ու պստիկ մտիկ էին տալիս սատանէքանց ոսներին ու վրաները ծիծաղում, գլխներին վէր հասում. ախար սատանէքանց ոսները մերի պէս չեն, նրանց կրունկն

չառաջ է, մատները կրնկի տեղը: Ուղիղ է, մեր տէր-Մանուկն էդ պէս բան չի անում, բայց սա էլ ուրիշ հրաշքներ է գործում: Ես իմ աչքովս տեսայ, էս մեր պառաւի (իւր կնոջ մասին է խօսքը) էլ միտքն է, թէ մի ամառ ինչ օյին խաղաց տէր-Մանուկը սար եկող Ղազարի թուրքերի գլուխը:

—Մնիրաւները մեզ շատ նեղութիւն էին տալիս, մեր հանդն ու արօտն ուտացնում էին, օր չէր անցկենում, որ մի վնաս չը հասցնէին:

—Այ երէց, ասացի, աշխարհքի համար կաս և մեզ համար չքուում ե՞ս, շնորհքդ մի ցոյց տո՛ւր էս մարդակերներին, մեզ դրանց ճանգիցն ազատի՛ր:

—Տէրտէրը քթի տակին ժպտաց, Փարաջէն յետ քաշեց, գօտկածալի կաղամարը բաց արեց ու ասաց.—դէ հիմի սէհր արէք (չաւարձանալ):

—Թուրքերի օրէքն (վրան) ու մերերն իրար դիմաց էին, մի բլրի գլխի նրանք էին պալըզած՝ մէկէլի վերայ մենք, իրարից հեռու էինք, բայց իրար սլարզ տեսնում էինք:

—Հէնց էնքան աչքովս ընկաւ, որ մեր տէրտէրը զրիշը դրեց իւր բութ մատի եղունկի վերայ ու մի բան խզմզեց: Մէկ էլ ի՛նչ, աչքդ բարին տեսնի, մա՛րդ, կնի՛կ, երեխա՛յ, տասը տարեկանից սկսած՝ շորահան եզան, շորերը կապեցին գլխներին դրին, վրաները մնաց, հեռու հացիցս, հեռու լսողաց, շապիկ ու շապկահընկեր. ամենքը կռնաբռնուկ արին ու մինչև ծնկները բաց՝ եալլա կանչելով՝ ճանապարհ ընկան, դէպի մեզ են գալիս:

—Հա՛յ հա՛ հա՛յ, դէ՛հ հա՛ դէ՛հ, ձայն ձայնի են տուել թուրքերը, քիչ մնա՛ց, մի՛ վախէք, սիրտ են տալիս իրարու, գետի վարար ու գոչգոչան տեղն անցկացանք, դժուարը պրծանք, շուտով ափը դուրս կը գանք, կերթանք մեր հարևան հայերի օրէքը կը քանդենք, կաւերենք, կը կողոպտենք, նրանց կը փախցնենք ու նրանց արօտատեղերը կը խլենք:

—Դու մի՛ ասիլ, մէ՛րս, տաքացած պատմում էր Ձուհլակինց Դաւիթը, մեր տէր-Մանուկը թուրքերի աչքին մի մեծ գետ է երևացրել, որպէս թէ մեր ու նրանց արանքովը կատաղած դետ է անցկենում. հիմի նրանք իրանց կարճ խելքովը գալիս են, որ մեզ տեղահան անեն, մեր իւրտը (իջևան) խլեն:

—Տէ՛ր իմ արարիչ, ծիծաղու կոտորուել ենք, մասններս կտրես՝ չենք հասկանալ, փորձներս բռնել, վեր ենք թափել.—ամա՛ն, այ երէ՛ց, ձէն տուի, քեզ մատա՛ղ, մենք մեռանք, մի ճար տե՛ս, էսքան ծիծաղն իւր քամակից լաց կը բերի:

—Հէնց էդ խօսքի վերայ՝ տէրտէրն եղունկի վերայ թքեց ու փեշով սրբեց:

—Թուրքերի աչքերը բացուեց, մնացին կիսաճանապարհին կանանչ տափի վերայ խոստառակուած, կանգնած: Վերջն ամօթները ծածկելու համար ձոր ու փոս մտան, թագ կացան, մկան ծակին հարիւր թուման կը տային, որ մէջը պարտակուին. բայց տէրտէրն էլ սպասել չը տուեց, կրկին գրիչը հանեց, եղունգի վերայ գրեց, նորից էս քո ղազախները զուրս թափուեցին ծակերիցն ու ինչպէս եկել էին, էն կարգով, որպէս թէ, ղեալ մտան ու յետ ղառան: Կիսաճանապարհին երկրորդ անգամ տէր-Մանուկը թլիսմը ջնջեց ու բոլորին դաշտի երեսին աղամմերկ թողեց:

—Էն օրից մինչև էսօր՝ մեր արօտատեղերից մի սմբուլ խոտ չի պակասում, մեր մի քնձոռոտ (աննշտն) ուլը չի կորել, մեր վերջին երեխի քիթն արիւնոտ չի եզել, Հիմի նրանք տէրտէրին տեսնելուս եօթն օրէն ճանապարհից մինչև ծուռն կը գլուխ են տալիս:

Վերջապէս ջուհրակ Դաւիթը լուեց և Տուտուն պատմեց կարճաւօտ իւր գալու պատճառը. նորաստելովը՝ օտարները խել են իւր քրոջ որդու նշանածին, աղջկանը զիր են արել, սիրտը գողացել են, չիմի ինքն ուզում է տէրտէրի վեցհազարեակի շնորհիւ իրանց հարսնացուին օտարի ձանգից յետ խել:

—Զեմ կարծում, որ մեր տէր-Մանուկն աղջիկ-տղայի գործում խառնուի, պատասխանեց ծեր Դաւիթը, էն վազ էր, ինչ էջը կաղ էր, էն վաղ էր, որ մեր տէրտէրը մի գրչի ծէրով երկու ջահէլ սրտեր մխատուզի (յոգնի) պէս քաշում, իրար էր կպցնում ու թէկուզ եօթը լուծք գոմէջ լծէիր, չէիր կարող ջոկել, բաժանել: Հիմի տէրտէրը քաշուում է տղայ ու աղջիկ սիրահարացնելու գիրն ու թլիսմ անելուց...

ԻԹ.

Ա Ն Ջ Ն Ա Պ Ա Շ Տ Պ Ա Ն Ո Ւ Թ Ի Ի Ն

Աշունը շատ պտղաւէտ էր, պատերազմը խիստ կատաղի. ռուսի զօրքը Կարսը շրջապատել նստել էր, աշտարակցիք բոլորեքեան հարստացել էին, գինին և օղին մեծ զին ունէին և այդ առևտուրի մէջ աշտարակցիների հետ մրցումն անել ոչ մէկի գործը չէր. նրանց մի ոտքը Կարս էր, միւսն Արարատեան այգեգործ գիւղերում. բուն Աշտարակի գինին մի կաթիլը մի ոսկւով չէիր ճարիլ, լաւ կամ վատ, թունդ թէ թոյլ, թէկուզ մի երակն էլ թթուած՝ հաւաքում էին գիւղերից, լցնում տկերի մէջ և երեք-չորս օրից այս բոլորը իջրէ Աշտարակու արտադրութիւն ծախում և վերադառնում, կրկին գիւղերն ընկնում:

Գնողներն էին սպաներն ու զինուորները:

Ոչ մի մարդ չէր վերադառնում պատերազմական դաշտից առանց նոր և թարմ լուրի, օրական մի քանի տեսակ համբաւներ էին տարածուում. մէկ հուշակուում էր, թէ Օսմանցին ջարդ ու փշուրխորտակուել է, նորա մի թէն իսպառ ոչնչացել է, միւս բաժինն իւր դնդերով գերի է բռնուել և քշուել խորին Ռուսաստան. միւս անգամ աղմուկն աշխարհը վերցնում էր, թէ Բէհհալը յետ է մղուել բաշիբոզուկներից մինչև Ախուրեանի ափը:

Այս լուրերից մի քանիսը հաստատութիւն էին գտնում, շատերն էլ հերքուում էին, նորութիւնները փոխադարձաբար ուրախութիւն և տխրութիւն էին պատճառում երկու դրացի այլակրօն ազգաբնակութիւններին. հայը հրճուում և փառք էր տալիս իւր Յիսուսին, որ հզօր է արեւ կրօնակից ռուսի քաջ բազուկը և խաչի անսասան զօրութիւնով ընկճել խորտակել է լուսնի արածայր եղջիւրները, իսկ պարսիկն առ երեսս ուրախութիւն էր արտայայտում, բարձր քաղաքական վարչութեան զբաւոր հրամանին համաձայն աղօթում էր իւր մէջիղներում՝ ռուսի զօրքի սուրը կտրուկ անելու համար. բայց ի ներքուստ նա մահաբեր հարուած և կարեւիւր խոց էր ստանում իւր սրտին:

Մեծ մարզարէի հաւատարիմ աւանգաւիպհ կանաչազլու խ մօլ-

լաները, սպիտակագլուխ ախունդները, նոյնպէս և փէյղամբարի սերունդ՝ կապտազլուխ սէյիդները՝ թափառաշրջիկ դաւրիշների գործակցութեամբ ստիպուած էին երկու հակասական դեր կատարել. նոցա բերանից միանուագ և հով էր փչում և ջերմ, տաճարի ամբիոնից մօլլան ոգևորուած աւետում էր ռուսի զօրքի յաղթութիւնը, իսկ մասնաւորապէս ամեն ուղղափառ իսլամի վերայ պարտք էր դնում՝ որ նա օրական երեք անգամ կատարելիք նամազից մէկը բաժին հանի իւր հոգուն, որպէս զի իւր մահից յետոյ Մահմեդի դրախտի մէջ հուրիփարիներով շրջապատած լինի, իսկ երկու նամազը նուիրէ Օսմանցութի յաջողութեանը:

Վերոգրեալ խտրութիւնը անջատել էր դարերով միասին ապրած հային ու թուրքին. նրանք միշտ իրարից զգոյշ էին և պատրաստ էին մեռում. հայն իւր անձնապաշտպանութեան վերայ էր մտածում, պարսիկը վրիժաւութեան և հայ գիւղերի բարիքին տիրանալու հոգսումն էր:

Թուրքն իրաւունք ունէր, լինելով բնական ծոյլ՝ իւր հոգերը հային էր ծախում շնչին գնով մշակելու և օգտուելու, իսկ ինքը պարապում էր միայն կեղեքելով և յափշտակելով:

Հէնց էդ պատճառաւ՝ պարսիկները միանգամայն հողի հետ հաւասարուեցան, պատերազմի առթիւ ծանրացած հարկերի ու հասերի ներքոյ ճկուեցին, ռամիկ ու շինական, բէգզադայ ու խանդադայ, մի կտոր հացի կարօտ մնացին. ընդհակառակն, հայ գեղջուկը հարկահաններին էլ էր կշտացնում, իւր տունն էլ բարօրութեան մէջ էր պահում և նոյն իսկ պարսկին էլ էր օգնում, դեռ աւելորդը վաճառելով՝ կարողութիւն էր դիզում:

Ի՞նչ անեն ուրեմն պարսիկները, որ չը նախանձեն. դիպոզ բուպէի էին սպասում, որ վրէժ առնեն. կուտակուել էին մթին և լեռնաչափ ամպերը, որոտմունք և փայլատակունք միայն պէտք էր՝ կարկտելու և շանթահարելու համար:

Այդ վայրկեանը մօտ էր:

Կայծակի արագութեամբ մի չարագուշակ գոյժ արձագանդ տուեց Կարսից մինչև Մասեաց ստորոտը, թէ ռուսի զօրքը մեծ հարուած է ստացել Օսմանեան բանակից:

Ռուսաց նորեկ քաջընտիր Դրագունի (Վէշտպուդն) զունդը՝ իրանց

անհմուտ զօրավարի առաջնորդութեամբ՝ շրջափակուել է առաջի կողմից տաճկական զօրքից, իսկ ետևից՝ ռուսական անհալատարիմ պարսիկ միլիցիայից (անլանն զբռ)։

Ու ոք չի կարողացել հսկել և իմանալ, որ միլիցիայի հրամանատար պարսիկ խանը գաղտնի բանակցութիւն է ունեցել տաճկի գլխավոր հրամատարի հետ, իսկ այստեղ բոլոր պարսիկ զիւզերին է պատուէր տուել՝ որ նշանը տալուն պէս՝ նրանք յարձակումն գործեն հալ զիւզերի վերայ և սուրբ քաշեն ու կողոպտեն բոլորին, մեծից մինչև փոքրը։

Միանուազ կազմակերպուած է եղել Օսմանցու խորամանկ փաշաների ձեռքով մի գունդ Քուրդ հրոսակներ, որոնք այդ յաջող բուսկում տաճկական դրօշակով երեք թնդանօթի ուղեկցութեամբ պէտք է միանային Ախուրեանի կողմի ավերի պարսիկների հետ և աւերածութիւններ անելով՝ հպատակութեան երզումն առնէին շայերից։

Կարգադրուած է եղել, որ զեւ Աղէքսանդրապօլը չ'առած՝ պարսիկ բազմամարդութեան օգնութեամբ. Երևանին տիրեն։

Օսմանեան հրամանատարն իրագործեց իւր ռազմագիտական ծրագիրը. ասում են, մի երկու ժամի մէջ բնաջինջ արեց պարսիկ միլիցիայի շնորհիւ կտրիճ և գեղանի Դրագուններին, զոցանից երկու թէ երեք հոգի միայն դիպուածով ազատուել են։

Յայանի չէ, թէ միլիցիայի դաւադրութիւնն ինչպէս հրապարակ եկաւ, բայց անհերքելի ճշմարտութիւն է, որ դեռ ոչինչ չեղած, դեռ թշուառական Դրագունների օրհասից մի շաբաթ յառաջ, Արագածոտնեան և Արարատեան դաշտի բոլոր հայերը գիտէին իրանց դրացիների նենգաւոր խորհուրդը և իրանք էլ իրանց կողմից պատրաստուեցան։

Հէնց այս ճգնաժամերի մէջ մեր հերոս Բղդէն, արհամարհելով ամեն արհաւիրք, մի կողմից իւր ցորենառութիւնն էր շարունակում, միւս կողմից հանգիստ չէր տալիս ջհուտ Աղաջանին։

Աղաջանը բացասական պտտասխան էր ուղարկել Բղդէին տեր-Յակովբի բերանով, անարգել էր իւր հոգատարութեամբ հացի տէր եղած չարչու ապերախտութիւնը և շտապում էր վերահաս փոթորիկներն անցնելուն պէս՝ պսակել իւր աղջկանը։

Բայց Աղաջանի բարկութիւնը կրկնապատկուեց, երբ մի երեկոյ իւր փեսայ Սահակը յանկարծ ներս բերեց քարշկուտելով մի պառաւ կնոջ:

Սահակը պատմեց, որ այս կնոջը բռնել է Աղաջանի շեմքի տակը փորելուս:

Ինքը Տուտուն էր. նա իւր բերած թլիսմներն էր գործ դնում: Պառաւն այլ ևս թոյլ չը տուեց իրան խուղարկելու, իւր ձեռքով հանեց երեք կախարդական փաթեթները և դրեց Աղաջանի յառաջը:

Նա ոչ միայն չը խոստովանեց իւր մասնակցութիւնն այս գործի մէջ, ընդհակառակն հաւատացրեց, որ ինքը մեղադրել է Բղդէին և մօրը իրանց անխիղճ վարմունքի գէմ, որ չը վախենալով Աստուածային արդար բարկութիւնից՝ ուզում են սատանայական հմայութիւններով երկու տարուան նշանը քանդել:

Տուտուն կծու երզումներով հաւատացրեց, որ ինքը մտադիր է եղել անձամբ թլիսմի փաթեթները Աղաջանին ներկայացնել, բայց եթէ այդ նա չի արել և միանգամից ղուռը չի բացել ու ներս եկել, այդ այն յարգելի պատճառաւ է եղել, որ ինքը Բղդէն զրացու պատի տակից հսկում էր և վերահասու էր իւր գործողութեանը:

Աղաջանը պատառոտելով թլիսմի գրերը՝ սպառնաց Բղդէին Տուտուի ձեռքով, որ եթէ նա ձեռք չի քաշի իւր վիմարութիւններից, ինքը սոփադուած կը լինի դիմել աւելի զսպիչ միջոցների:

—Այնքան ծեծել կը տամ քեզ, ապսպարանք արեց Տուտուի ձեռքով Աղաջանը Բղդէին, որ շաբթէ շաբաթ կը գժուես:

Տուտուն վերադարձաւ և տասնապատիկն աւելացրած՝ պատմեց Բղդէին, ասելով՝ թէ իւր անձը կապուտ լեղակ է դարձել Աղաջանի և իւր փեսացուի մահակներից:

Լալով պատմեց Տուտուն, թէ չոքել համբուրել է Աղաջանի ոտքը, համաձայնել է սիրով կրել ամենատեսակ ծեծ ու պատիժ, միայն թէ իրան դարձնէին իւր ծոցից հանած թլիսմը, իբր թէ ինքը կամեցել է հաւատացնել, թէ այդ թղթերը ոչ թէ սիրահարական յուռութքներ էին, այլ իւր որդու գլխացաւի գրերը:

—Աղաչեցի, գլուխս ոտքի տակին մատաղ անել խոստացայ, շարունակեց Տուտուն, բայց ինչ օգուտ՝ ուշաթափուեցայ, փոքր մնաց

խելքս կորցնում էի, երբ յանկարծ երեք փաթեթների բոցը լուսա-
ւորեց մութը տունը, օջաղի մէջ վառուող կրակը մի բուպէումը լա-
փեց իմ դառն քրտնքի արդիւնքը:

— Նա՛տ լաւ, գլուխը թափահարեց Բղդէն, տեսնենք՝ թէ ո՞վ
ո՞ւմնից վրէժ կ'առնի:

Բայց ոչ Աղաջանն իւր սպառնալիքը գլուխ տանելու ժամանակ
ունեցաւ և ոչ Բղդէն կամեցաւ շուտով իւր մտքումն յղացած խոր-
հուրդը իրագործել:

Ի՛նչ մանր և չնչին կրքեր յագեցնելու միջոց էր, երկիրն ա-
րիւնը վերցրել էր:

Իե՛ռ նոր բերանից բերան թռչում էր Դրագունի գնդի կոտո-
րումի գոյժը, ահա Արագած լեռան հիւսիսային հայ գիւղերը
ռասանեցան:

Արագածի արևմտահիւսիսային սահմանամօտ հայ գիւղերում
Քրդի հրոսակներն իրանց համայնքների գլխաւորների առաջնորդու-
թեամբ Օսմանեան զրօշակը տնկեցին և հպատակութեան խոստումն
առան:

Քրդերից խրախուսուած մեր պարսիկ դրացիները խմբաւորուե-
ցին և յարձակուելու պատրաստուեցան: Անշասիրութեան քաղցը
այնքան ուժգին էր նոցա մէջ, որ էլ չը սպասեցին Օսմանեան զրօ-
շակին և թնդանօթին, այլ խմբակներով յարձակում գործեցին այս և
այն գիւղերի վերայ:

Բայց որովհետև, ինչպէս ասացինք, հայերն էլ իրանց կողմից
պատրաստ էին, ամեն տեղ պարսիկներն անյաջողութիւնի հանդի-
պեցան և յետ ընկրկեցին:

Կատաղի էին դարձել հայերը. տասն և վեց սարեկանից վեր,
ամեն տղամարդ, բացի դաշոյնից, մի քանի կրակ ունէր վրան: Սիրելի
էր տեսնել, թէ ինչպէս երեկուան խաղի գնդակով զուարճացող պա-
տանին այսօր մի երկու ատրճանակ զօսկածալումն ամրացրած՝ մի
ծանր հրացան էլ ուսին դրած՝ ցորեկ ու գիշեր հսկում է հերթով
գիւղի շրջակայքում:

Հրացաններից շատերը սեպհական էին, մի մասն էլ ստացել
էին Պետութիւնից:

Չ'ունեցողներին տէրութիւնը ղէնք, վառօդ ու գնտակ էր ընձեռել:

Իւրաքանչիւր գիւղ իւր ամուր և ապահով մասում ժողոված իւր ընտանիքը և երեխաներին, պաշտպանուում էր:

Ամեն գիւղ իւր գլխաւոր հրամանատարը, իւր յիսնապետներն ու տասնապետներն ունէր. ամեն մէկի պաշտօնը որոշ էր և յայտնի:

Բացի մասնաւոր անձնապաշտպանութիւնից, մերձաւոր զիւղերը միմեանց փոխադարձ օգնութիւն հասնելու ուխտ էլ արել էին:

Կարբու յիսնապետներից մէկն էր ջհուտ Աղաջանը: Նորան ստորադրեալ էր ուրիշների կարգում և իւր փեսայ Սահակը, իսկ Կարբու ընդհանուր հրամատարն էր ինքը՝ իւր սիրելի հօտի անձնազիր հովիւ քաջասիրտ տէր-Յակովբը:

Միակ բացակայ անդամը Կարբու բնակիչների մէջ էր Բղդէն, որ իբրև պաշտօնական անձն, իրաւունք չ'ուներ մասնակցելու համայնական պարտակատարութիւններին:

Մի քանի գիշեր Բղդէն էլ Կարբի շէր գալիս, ոչ ոք էլ հետաքրքիր չէր լինում իմանալ նորա գիշերելու տեղը:

Միայն Սալբին իբրև մայր՝ հոգւոց էր քաշում իւր որդու տեսքովը կարօտած: Նրան էլ մխիթարում էր իւր զրկից Տուտու նանը՝ օրական մի քանի անգամ գալով նորա մօտ քթախոտ քաշելու:

Մի երեկոյ վերջնալուսից յետոյ, մինչ գիւղապահ ղինակիրները դեռ նոր դուրս էին եկել իրանց հսկողութեան պաշտօնը կատարելու, Կարբու արևմտահիւսիսային կողմից երեք ձիաւոր կամեցան Կարբի մտնել:

Գիշերապահութեան հերթը ջհուտ Աղաջանի խմբինն էր: Աղաջանը դեռ տանից չէր եկել, նորա տեղը կառավարիչ էր ժամանակաւորապէս իւր փեսացու Սահակը:

Վերջինս տեսնելով հնուուից ստուերները, կարգի հրաւիրեց իւր խմբին և գոչեց.

— Ո՞վ էք, մի՛ մօտենաք, ասպ թէ ոչ գնդակահար գետին կը գլորուիք:

— Ես եմ, Սհօ եղբայր, երկիւղ մի՛ կրիր, ձայն եկաւ դիմացից:

— Իսկ ուղեկիցներդ ո՞վ են, կրկին հարցրեց Սհօն:

— Իմ ձիաւորներն են:

— Իրաւունք չը կայ գիւղը թուրքեր տուն թողնել. եթէ ուզում ես դալ, պէտք է դրանց յետ դարձնես:

Դեռ հանդիպից պատասխան չը ստացած՝ Սոն մի մարդ վազեցրեց իւզբաշու ետեից։

Իւզբաշի կոչուում էր խմբապետը։

Այս խմբի իւզբաշին գիտենք որ Աղաջանն էր։

— Դու մի՞թէ ինձ չը ճանաչեցիր, Սոն եղբայր, կրկին ձայն եկաւ հակառակ կողմից շատ ուշ։ Երևում է, որ եկաւորների մէջ մի կարճ խորհրդակցութիւն էր կայացել։

Առաջին անգամից ճանաչեցի, պ. Բազգասա՛ր, պատասխանեց Սոն, բայց եթէ հետիդ մարդիկը թուրք են, իրաւունք չ'ունիմ առանց իւզբաշու հրամանի ներս ընդունել։

Մինչ այս, մինչ այն՝ Աղաջանը ձին հեծած եկաւ և իմանալով գործի էութիւնը՝ յառաջ կանչեց Բղդէին իւր ընկերներով։

Գիշերը պարզ էր. լուսինը 18 օրական լինելով՝ շատ ժամանակ չէր, որ իւր աղօտ փայլը սփռել էր աշխարհքի երեսին, բայց լուսնի լոյսը բաւական էր յայտնի կացուցանելու Բղդէի ձիաւորներին։

Նոքա էին Արագածի լանջի վերայ գտնուած Ք. գիւղի բեգ-զաղէքանցից երկուսը; որոնք որքան և ազնուատոհմ՝ բայց մարդասպան աւազակների համբաւ էին հանել ամբողջ գաւառումը։

Բղդէն Աղաջանին բարև տուեց և մօտ եկաւ։

— Ո՞րտեղից այս կէս գիշերին, սառնութեամբ հարցրեց Աղաջանը։

Գիւղերից. մի քանի խալվար ցորեն էին պահանջել, Քալինի կողմովը ճանապարհ դրի և վերադարձայ։

— Իսկ սրանց ընչո՞ւ ես քեզ հետ շրջեցնում։

— Քալինցի ձիաւորների հետ եկայ մինչև սրանց գիւղը, նրանց վերադարձրի և սրանց հետս վերցրի։

— Եւ երկիւղ չը կրեցիր։

— Ընչի՞ց և ո՞ւմնից։

— Իբր թէ՛ դու աշխարհքից տեղեկութիւն չ'ունիս, որ Սամանցին ուուին յետ է քշել, քուրդը Քալինի գաւառն է մտել, սարի վրայի պարսիկ գիւղերն էլ պատրաստուել են մեր վրայ յարձակուել։

Բղդէն երդուեց, որ ինքը Քալինի կողմից ցորենը ճանապարհէ ձգել իւր հսկողութեամբ, թէ մի քանի օր է ինքը թուրք ու հայ գիւղերում շրջում է և ոչինչ վտանգ կամ շփոթ չի նկատել։

Ապա դառնալով իւր ուղեկիցներին ասաց.

—Տղէ՛ք, տեսնու՛մ էք մեր հայերի պատրաստութիւնը, չը լինի՞ թէ յիմարանաք, մտքներովդ չարութիւններ անցկացնէք, եթէ ուրիշներն էլ չը լինին, մեր ՍՀօն հերիք է ձեզանից տասին գնդակախորով անել. տեսնու՛մ էք՝ ինչպէս գեգեցիկ զրահաւորուած է, լաւ տնտղեցէք սորա դէմքին ու հասակին. ինքը նշանած տղայ է, մուրազի վրայ է, մի քանի օրից փափագին կը հասնի. մեր իւզբաշի Աղաջանի փեսացուն է:

—Աստուած տա՛յ, Աստուած տայ, կրկնեցին թուրքերը, կտրի՛ծ տղամարդ է երևում, ջիւան է, ջահել է:

—Առանց շատախօսութեան վերադարձրու թուրքերիդ և ինքդ գնա քո սուռնը, խստութեամբ պատուէր արձակեց Աղաջանը:

—Տղէ՛ք, ձայն սուեց Բղդէն, իւզբաշի Աղաջանը նեղանում է, որ դուք գովութեամբ էք խօսում իւր փեսացուի վերայ, բաւական է, շնորհակալ եմ, կարող էք վերադառնալ ձեր գիւղը:

Թուրքերը գիշեր բարի մաղթելով յետ գնացին, իսկ Բղդէն մտաւ Կարբի և իջաւ իւր տանը:

—Դու քո հացը կերար, իւզբաշի Աղաջան, քո փեսայ ՍՀօյից հետ միասին, Ալին ու Մահմատ-Վալին այսուհետև ականակիր խաւարի մէջն էլ կարող են հարիւրաւոր մարդկանց մէջ որոշել քեզ ու քո փեսին, եթէ էս գիշեր չը յաջողեցրին, էգուց կամ էլօր երկուսիւ արևն էլ մէր կը մնցնեն, դեղին ոսկիքը ձեր ուղուրին են նրանց զրպանը մտել. էն ժամանակը, Շողիկ ջա՛ն, չոքէ չոք ոտս կը գաս:

Լ.

ՈՒՐ ԶԱՐԱԳՈՐԾՈՒԹԻՒՆՆ ԱՆՊԱՏԻԺ Է ՄՆՈՒՄ

—Մողին տարա՛ն, սուրբ Գէորդը քանդեցի՛ն:

Ահա այն բօթատու լուրը, որ փոթորկալից քամու նման խուովեց առանց դորան էլ անհանգստութեան մէջ ծփացող և մոլորուած Մողին շրջապատող հայ գիւղերը:

Աշտարակ՝ հարաւից, Կարբի՝ հիւսիսից և Փարբի՝ արևմտքից. երեքից առաջին երկուսը զուտ հայաբնակ, վերջինը հայ ու թուրք խառն մի գիւղ:

Վերջինիցս օգնութիւն սպասելն աւելորդ էր, վաղի առակի պէս՝

քաչալը դեղ իմանայ, իւր գլխին կանի, ինքը աշնան սերևի նման դեզնել է սեպհական անհաւատարիմ զրացիներից, երկիւղից մի աննշան հողմիկի հարուածը բաւական է նրան սալարեցնել. իսկ առաջին երկուքը նոյնպէս իրանց գլխի ծարը տեսնելու հոգսերումն են. հետևաբար ժամանակ չէին կարող ունենալ ուշադիր լինել գուշաբերներին:

Սխալ ենթադրութիւն. հայը խաղաղ ժամանակ մուացկոտութեան ենթարկուած՝ անտարբեր է գէպի ինքնաճանաչութեան վսևմ զգացմունքը, իսկ նեղութեան ժամանակնա գիտէ անձնազոհ գոնուել, արհամարհել ամենայն Կժուարութիւններ, տանջանքներ, մահ, մանաւանդ երբ վտանգը սպառնում է իւր դարաւոր նուիրականութիւններին, իւր կրօնին, իւր ազգային սրբութիւններին, իւր եկեղեցւոյն:

— Մողին տարան, վանքը քանդեցին:

Հերիք էր այս երկու խօսքը գիշերուան թանձր մթութեան մէջ հասնէր մի աշտարակցու, կարբեցու, մի հեռու. կամ մօտիկ հայի ականջին և սպասելու էր այն՝ ինչ որ կատարուեցաւ:

Գոյժը տարածողը վանահօր կողմից ուղարկուած մողեցիք էին:

Մողի գիւղում գտնուած սուրբ Գէորգայ վանքը, թէպէտ մեծ և հուսկաւոր ուխտատեղի է և նորա ուխտի ժամանակ՝ գլխաւորապէս աշունքը՝ տասնեակ հազար ժողովուրդ հինգ վեց աւուր ծանապարհից խռնուում են լիզել հինաւուրց մենաստանի քարերը, բայց նա չ'ունի մեծ միաբանութիւն:

Հասարակ օրերի մշտակայ վանքականները մի վարդապետ է վանահայր անուամբ, մի պառաւ տնտես կինէ, որ հայր սուրբի համար պարզ և անպաճոյճ կերակուրներ է եփում, նորա փոխնորդն է լուանում և վանքին մատաղ բերած երկու երեք կովերն է կթում, մի Մշու երկրացի՝ հայրենիքից փախած՝ վանքի չորս պատերի մէջ պատուարուած, անվարձ մշակ է, որ ամառները գոմի դրանն է խորշում յոգնած ու լախտուած դաշտիցը վերադառնալուց չետոյ և ձմեռը գոմի օդայումը մրավում, լուերի մէջ խումփացնում և մի պատանի մոնթ է՝ վարդապետի ազգականներից կամ ծանօթներից՝ որ յատուկ նրան աշակերտելու և ծառայելու համար եկած է:

Ուրեմն ընդամենը չորս կամ առ առաւելն վեց հոգի են, որոնց

վճռած է վանքի լայնատարած բակի մէջ ապրել և վանքի պաշտպանութեանն իրանց անձը նուիրել:

Սոքա միայն են և ուրիշ ոչ ոք, որ տարին բոլոր ընդունում են և պատուով ձանապարհ են դնում վանքն այցելող հայ և օտարազգի ուխտաւորներին, սոքա են սուրբ Գէորգայ թանգարանի, մասունքների և սրբազան անօթների աւանդապահները:

Ոչ պարսկական բռնակալ իշխանութեան օրերում և ոչ մեր ժամանակները լսուած չէր, որ սակաւաքանակ վանքականները վտանգի ենթարկուած լինէին:

Ճիշդ է՝ վանքը շրջապատած է քառակուսի հաստահիմն պարսպով, դեռ մի ուրիշ ամուր պատնէշ էլ բաժանել է բակն արտաքին և ներքին մասերի, բայց այդ ամրութիւնները ոչինչ նշանակութիւն չունէին հրոսակների յարձակմունքների դէմ, եթէ մի երկու տասնեակ ձիաւոր մտադրուէին խրամատով պարսպի մի պատը և ներս խուժել վանքի բակը, դժուար չէր նմանապէս կրնկահան անել երկփեղկեաց դռները:

Զէ, մտածելն անգամ յանցանք էր:

Սուրբ Գէորգայ հրաշագործութեան հուշակը սարսափ էր ներշնչել զբացի անքրիստոնեաց մահմեդականին և քրդին, ոչ սակաւանդամ պարսկի մօլլէն կենդանի մատաղով սուրբ Գէորգայ դուռն է եկել, մոմ է վառել և զանձանակ է տուել ընչի՞ց, կամ ո՞ւմնից, ապաքէն, պէտք է երկիւղ կրէին վանքցիք, կամ ընչո՞ւ կասկած կը տանէին, թէ մի օր ստահակ մարդիկ կարող են իրանց դարևոր սովորութիւնները ոտնատակ տալ, կարող են յանդգնել և պիղծ ձեռներով մօտենալ մեծահամբաւ սրբավայրին:

Եթէ այս յարգելի և ծանրակշիւ հանգամանքները չը լինէին, ոչ վանքի հարաւային պարսպին կից 15 տուն Մոզնի գեղն իւր մի քանի քաղցած ու տկոյր անհոգ գիւղականներով և ոչ նոյն ինքը վանահայրը՝ այս երկիւղալի ժամանակն այսքան ապահով ու անվրդով կը լինէին:

— Հայր սո՛ւրբ, հայր սո՛ւրբ, բաղխում է սպասաւոր պատանին վարդապետի մենարանի փակած դուռը՝ կէս դիշերին:

— Անիծեալ, ի՛նչ ես անհանգիստ անում, դեռ կէս գիշեր չը կայ, ի՛նչ ժամի ժամանակ է, որ զարթնացնում ես, քեզ համար

սովորութիւն ես արել, շեա թողնում՝ մի քիչ քննեք, ես այս առա-
ւօտ ժամ շեմ գալու, եթէ կամենում ես, ձայն տուր բաշի գլխից
տէր Բարսեղին, թող գայ ժամն ասէ:

— Զարթիր, հայր սուրբ, ժամի համար շեմ քեզ վերկացնում,
դեռ կէս գիշեր էլ չի եղել:

— Ուրեմն ի՞նչ ես գլուխս ցաւացնում:

— Զե՛ս լսում դրսի դրան բաղխումները, վանքը պատել են,
թուրքերը դռները ջարդում են:

— Իրա՛ւ, այս ի՞նչ թխթխկոց ու շառաշիւն է, վերցատկեց
հայր սուրբը և անմիջապէս մի խելացի կարգադրութիւն արեց:

— Եթէ թշնամին յարձակումն չի գործել գիւղի վերայ, հրամայեց
վանահայրն իւր փոքրաւորին, իջիր պատովը, զարթնացրու տէրտէ-
րին և մի քանիսին, իսկոյն ուղարկիր Աշտարակ, Կարբի ու Փարբի
օգնութիւն խնդրելու: Վնաս չունի, դռներն ամուր են, մանաւանդ
միջի դուռը երկաթապատ է, մինչև տեղահաս անելը օգնութիւնը
վերայ կը հասնի:

Պատանու ուղարկած մոզնեցիքն էին, որ մի շնչի վազելով՝ շփոթ
ձգեցին վերոյիշեալ գիւղերը:

— Նո՛ւտ, քաջ եղբայրներս, կարգադրեցին հսկող իւղբաշիքը,
գիւղը հաւար ձգեցէք, թող բոլորեքեան զէնք վերցնեն, մի մասը
գիւղը պաշտպանեն, միւսը զինաւորուած՝ շտապեն Մոզնին պաշտ-
պանելու:

Հայր սուրբն ուղիղ դատեց, վանքը կողոպտող հրոսակները՝ թուով
չխուսնի չափ՝ դեռ նոր քանդել էին պարսպի արտաքին պատը և
սկսում էին խոռել գոմի պատը, որ միակ յարմար տեղն էր ներսի բակը
մտնելու համար, երբ Աշտարակու և Կարբու սպառազինած ձիաւոր-
ները կրակ կտրած՝ միաժամանակ վրայ հասան: Քիչ միջոցից մի
քանի փարբեցիք էլ հասան:

Նփոթն ընկաւ թուրքերի մէջ:

Քանդած պատի մօտ պահապան կարգած ձիաւորներն իմաց
տուին իրանց ընկերներին օգնութիւն եկողների մասին և աւերիչ-
ները յետ դարձան:

Հայերը մնացել էին մոլորուած, դրսի դուռը փակ էր, հարա-
ւային կողմի պարիսպը և Մոզնի գիւղը նոյնպէս անվնաս, իսկ վար-

դասպետն ու մողանցիք խցերի կտերը աղաղակ և գոռոցներ էին հանում:

—Հայր սուրբ, ձայն տուեց Աշտարակցի իւղբաշի աւչի Փիլումբը, ո՛ւրեն թշնամիքը:

—Օրհնեա՛լ լինիք, քա՛ջ զաւակներս, թշնամին ներս է լցուել՝ արևեան կողմից պատը քանդելով, ի սէ՛ր Աստուծոյ, դուք զգոյշ եղէք, չը լինի՝ թէ յանկարծ կուուի բանուիք, նոքա ձեզանից կրկնապատիկ աւելի են, ես վերնայարկի լուսամտից լաւ դիտեցի:

Փիլումբը փորձառու զօրավարի նման իւր վերայ առաւ ընդհանուր հրամանատարութիւնը և իւր գունդը, եթէ կարելի է այսպէս ասել, երկու բաժանեց, կարբեցիներին և փարբեցիներին գիւղի տակովն ուղարկեց պարսպի արևմտեան կողմը փակելու, իսկ ինքը իւր խմբովն անցաւ արևելք:

—Ես ինքս ներս կը մտնեմ բակը, կարգադրեց Փիլումբը և մի երկու գնդակ կարձակեմ դէպի թուրքերը, շփոթ կը բարձրացնեմ, եթէ թշնամին յանդգնի անուշադիր գոնուել և կամենայ վանքի ներսի բակը մտնել, մենք ետևից ջարդ կը տանք, իսկ եթէ փախուտ տալու լինի, թոյլ տուէք առանց արիւն թափելու հեռանան:

Փիլումբի կարգադրութիւնը զուր անցաւ:

Յանկարծ մէկսմէկու ետևից դուրս թափուեցին թուրքերը և վախկոտ նապաստակի նման կորու՛ւմ էին իրանց որսորդների ձեռքից:

—Ո՛չ մի գնդակ զուր տեղը չը կորցնէք, ուզում էր հրամայել Փիլումբը, բայց խօսքը բերանին մնաց, փախչողների միջից մի հրացանի պայթիւն լուեցաւ. գիշեր էր, գնդակը կրակ կտրած՝ շեշտուեց դէպի Վարբեցոնց խումբը:

—Ես ընկայ, տղէ՛ք, վրէ՛ժ առէք, ձայն տուեց առաջապահ ձիաւորը և զլխի վայր ձիուց գետին ընկաւ:

—Ո՞վ էր ընկնողը, գուցեց Փիլումբը և դեռ իւր պատասխանը չը ստացած՝ ինքն իւր հրացանն ուղղեց դէպի գնդակը դուրս թռած ուղղութիւնը:

—Աղաջանն էր, մեր իւղբաշին, լուեց կարբեցոնց կողմից:

—Վրէ՛ժ, առիւծի նման մռնչաց Փիլումբը, քամակիցս եկէք, սպանե՛նք, բրդե՛նք և ո՛չ մի թուրքի չը թողնենք կենդանի յետ դառնան:

—Նալլա՛, սուրբ Գէորգը մեր կուանը կենա՛յ, գոչեցին բոլորն քեան
և Փիլուսի հետ յառաջ մղուեցան:

Գնդակների շաշիւնը և փայլը գիշերուան խաւարի մէջ նմա-
նում էր դարբնոցի սալի վրայից դուրս ցայտած կայծերի, երբ
կուանահարները հաստակուռ մուրճերը կարգով զարկում են հրաշէկ
երկաթին:

Վերջապէս լուսթիւնը տիրեց, էլ ձայն ու ձուն չի լսուում, էլ
ձիրանոնց դոփիւն և դրոփիւն չը կայ:

Տեղը մնացին երկու-երեք թուրքեր, որոնք Փիլուսի և ուրիշների
գնդակներից Մահմեդի արքայութիւնն էին վերափոխուել:

—Բաւական է, տղայք, վերադարձէք ամենքդ ձեր գիւղերը,
կարգադրեց Փիլումը, սպանուած թուրքերն էլ թող տեղն ու տեղը
մնան, եթէ իրանք չը տանին, էդուց մենք նաչալնիկին իմաց կը
տանք:

Մեր տղայքը Փիլուսի տնօրէնութեամբ վերադարձան:

Աշինչ բանով կարբեցիք չը համաձայնուեցին Աղաջանի մարմինը
թողնելու Մողնումը. հայր սուրբը շատ յորդարական խօսքեր ասաց,
բայց հնար չ'եղաւ:

Կարբեցիք իրանց մեռեալը կապեցին նորա ձիու վերայ և մեծ
սգով յետ դարձան:

Հաւատարիմ կենդանին իւր տիրոջ մարմնի մօտից չէր հեռացել:

Կարբու և Մողնու միջասահմանումը Քասախի քարքարուտ
ափին մօտ, ճանապարհից մի քայլ հեռու գտնուում է Մողնու
սուրբ Գէորգայ նախկին վանահայրերի և միաբանների գերեզմանոցը:

Նոյն տեղումը սրբակեացների շիրիմներից դէպի արևելք՝ այսօր
էլ զոյգ կանգնած են իրար մօտ երկու բարձրադիր, մամուապատ
«ձիաքար» կոչուած տապանաքարեր: Եթէ չի չիղողութիւնս ինձ չի
ղաւաճանում, դամբարաններից մէկի վերնագիրն է ուստա Մու-
րատինը:

Աւանդութիւնն այսօր էլ Մուրատին ընդունում է սուրբ Գէոր-
գայ հրաշակերտ վանքի կառուցանողը: Միւս տապանը վերագրուում
է քաջահամուտ վարպետի ուշիմ աշակերտին:

Մի փոքրիկ «Սև շալու, կամ զժնիկ» կոչուած փուշ՝ չեմ սխալուիլ, եթէ ասեմ՝ զարերով անջատել և կրկին շողկապել է միմիանց հետ այդ երկու յիշատակարանները, որոնք առանձին իմն պատկառանքով գրաւել են տեղացիների քաղցր համակրանքը: Ամեն ոք սրբադան պարտականութիւն է համարում անձին՝ այնտեղից անցկենալու» յիշել Մուրատին և իւր աշակերտին և «Աստուած ողորմի սրանց հոգևոյն» խօսքերի հետ պատմել իւր ուղեկցին՝ վարպետի և աշակերտի նահատակութեան հետաքրքիր պատմութիւնը:

Անցքը շատ կարճ է. Մուրատը հոգւով և սրտով սիրելու է եղել իւր աշակերտին՝ նորա մեծ ընդունակութեան և հմտութեան պատճառաւ. նրա ասութեամբը՝ աշակերտն իւր աջ կուռն է եղել:

Վանքի մեծ կաթուղիկէն կառուցանելիս՝ աշակերտի ոտքը սահում է և նա վայր ընկնելով մեռնում է:

Զարադէտ զժբաղդութիւնը Մուրատին բարոյապէս ընկճում է. նա յուսահատուում է, ողևորութիւնը կորցնում է և չի կամենում շէնքը շարունակել: Մուրատը Վանահօր և ուրիշների թախանձանքներին զիջանելով՝ վերջապէս մի քանի օրից իսպառ աւարտում է գմբէթը և վերջին քարն ամրացնելուց յետոյ՝ ինքն իրեն գոհավիժ ցած է գլորում այն բարձրութիւնից:

Վախճանը բոպէական է լինում:

Մուրատի վերջին խօսքն այս է լինում. «ի՛նչ կարող է գործել ձախ ձեռն առանց աջի»:

Նաղիւ վանքին օգնութիւն եկած կարբեցի ձիաւորները հասել էին Մուրատի գերեզմանի հանդէպը, որ ամպերի պատառուածքներից լուսնի լուսով նշմարեցին նրանք վարպետի և աշակերտի տապանների արանքին փշի թփի ստուերումը շարժուող մի էակ:

Բստիներնց Սահակը անհեռատեսութեամբ ձին յառաջ վարեց եղելութիւնը ստուղելու:

—Որան իւր ոտքովն է գալիս, Ալի բէ՛գ, գործերս յաջող է գնում, Մողնումն Աղաջանի գլուխը խաշեցինք, փեսացուն էլ հիմի իմ գնդակին մատաղ կը լինի և մենք մեզ խոստացած օսկիքը վաղը գրպաններս կը լցնենք. խօջէն խօսքին տէր մարդ է:

Այս խօսքերի հետ միասին Մուրատի գերեզմանաքարի սակից գլուխը վեր բարձրացրեց մի թուրք և հրացանն ու ղղից զէպի Սահակը:

Գնդակը փչրեց Սահակի ձախ ուսագլուխը:

— Դաւադրութի՛ւն, մեր տղէ՛ք, գոչեց Սահակը և ուշք չը դարձրած իւր վէրքին՝ ատրձանակով փոխադարձ մահացու հարուածը տուեց հակառակորդի ուղիղ կրծքի մէջ տեղից:

Թուրքն անշունչ տարածուեց գետինին:

Նոյն այդ միջոցին աշակերտի գերեզմանաքարի ետևից մի ուրիշ գնդակ արձակուեց դէպի Սահակը:

Հարուածն անյաջող անցկացաւ. գնդակը շափւնով սլլաց Սահակի գլխավերևով:

Դարան մտած մարդը տեղից կանգնեց և կամենում էր թուրը պատեանիցը դուրս քաշել:

Սուրը մնաց կիսահանել: Կարբեցիներից, մի կտրիճ երիտասարդ հայնոյական խօսքերով յաւաջ մղուեց և քրդական կեռակտուց սրով դաւաճանին խոր խոցեց մինչև թոքերը:

Շոգենաւի հատուածական փունչոցի նման դուրս էր փչում արիւնը՝ շնչառութեան հետ միասին՝ գլորուողի լայնաբերան վէրքի ճեղքից:

— Անրակի ոսկրի կէսը մնացել էր պարանոցին կպած միւս կտորը կւան հետ կախ էր ընկել:

— Աղայ Մողնի՛ն... մեր պատի՛ժը... տուե՛ց... Մահմատ-Վալի բէ՛գ... նա կը պատժի և մեզ զրդողի՛ն... ա՛լս... խօջա...

Խռխռոցը մեղմացաւ, կիսահնչիւն և կիսաւարտ խօսքերը ասողի բերանումը սառեցին:

Մինչ այս, մինչ այն, Կարբեցիք գրկել իջեցրել էին ձիուց Սահակին և մէջքը գերեզմանաքարին դէմ տուած՝ աշխատում էին դադարեցնել վէրքից դուրս թորած ապաժոյժ արիւնը: Դաւադրութի՛ւն, տղէ՛ք, ուշակորոյս կրկնեց մի քանի անգամ Սահակը, այս սպանուածներին եւ ճանաչեցի... սրանք երեկ զիշեր մեր զիւղի կողքից յետ դարձան... մի վատ մարդի մատը խառն է այս անբաղդու-թեան մէջ...:

Սահակն այլ ևս չը կարողացաւ շարունակել. նրա ուշքը գնաց. նա հազիւ ծանր շնչում էր:

Անկարելի էր Սահակին ձիու վերայ նստացնել:

Երիտասարդներից մի ուժեղը առաջարկեց իւր ծառայութիւնը:

Վէրքը խնամքով պատած՝ Սհօյին զրին այս սղաչի շալակը և ամուր կապած՝ առան գնացին:

Թուրքերի մարմինը մնաց գերեզմանոցումն ընկած:

Դաւառական վարչութիւնը միւս օրն ամեն տեղ որոնել տուաւ և չը գտաւ ոչ միայն այս երկու սպանուածներին, այլ և փախչող բազմութեան միջից ընկնողներին:

Շատ շուտ լուր տարածուեց, թէ Վարչութիւնը հէնց երկրորդ օրը բացել է սպանուածների հետքը:

Աղաջանի մարմինը հողին յանձնուեց առանց աղմուկ բարձրացնելու:

Նրա փեսացուն շարունակում էր կռիւս տալ կեանքի հետ:

Սնկայուն դրութիւնը կարճատև եղաւ, տաճիկների հաշիւները սխալ դուրս եկան:

Բէհրուզովը մի անօրինակ քաջագործութիւն արեց, սակաւաթիւ զօրքով մի յանդուգն յարձակում գործեց նա թշնամու առթիւ բանակի վերայ և ցրիւ տուեց:

Օսմանցին կրկին յետ փախաւ, Կարսումը փակուեց:

Շատ չը քաշեց, նա Կարսից էլ զրկուեց:

Բէհրուզովը Կարսն առաւ, յանձնեց իրան յաջորդող նոր հրամանատարին և ինքը վերադարձաւ հանգիստ առնելու...:

Եւամեայ պատերազմից յետոյ նոր հրամանատարը կապեց հաշտութեան պայմանը և խաղաղութիւնը վերականգնեց:

Կարսը դարձեալ յետ արուեց իւր նախկին տիրապետող Օսմանցունին:

Յիսնական թուականների արևելեան պատերազմի վառ կրակը այսպիսով առժամանակ մոխրակոյտի տակ անթեքուեց (~~ծածկուեց~~), թազուեց:

Իմ դրախտի բաժին մայրիկս էլ նոյն հնարքն էր գործ դնում. առաջի օրը թոնրի խորքումը մոխրի մէջ թաղում էր կրակի թէժ կտորները, որպէս զի միւս օրը բաց անի, չորացած խոխուներ դարսի վրէն, կրակն աւելի ուժգին բորբոքի ու մեզ համար անուշ անուշ կերակուրներ պատրաստի:

(Կը շարունակւի)